



JUDISIAL **SISTEM** MONITORING PROGRAMME

PROGRAMA DE MONITORIZASAUN DO **SISTEMA** JUDISIAL

Komunikadu Imprensa

03/07/2013

Tribunál Distritál Suai hala'o julgamentu movel iha Distritu Bobonaro

Iha 26 no 27 Juñu 2013, Tribunál Distritál Suai hala'o julgamentu movel ba kazu 8 iha Distritu Bobonaro. Kazu hirak ne'e kompostu husi kazu krime omisidui simples 2, kazu violasaun seksuál 3, kazu omisidui negligente 2, no furtu agravadu 1.

Julgamentu movel nu'udar meu ida atu lori justisa hakbesik ba povu ne'ebé distansia hela fatin dook husi tribunál, nune'e sira asesu ba prosesu justisa formál. Programa ne'e hetan apoiu finansieru husi UNDP.

Iha kazu 7 mak konklui ona nia prosesu no ida seluk sei decide iha 12 Jullu 2013. Kazu omisidui negligente 1 hetan pena prizaun tinan 2 fulan 6 maibe suspende ba tinan 5, ida hetan absolvisaan tanba Minstériu Públiku la prova katak arguidu iha intensaun atu oho vítima.

Entertantu kazu violasaun 1 konklui ho pena prizaun tinan 8 no ida seluk tribunál absolve no kazu furtu agravadu konklui ho pena prizaun tinan 2 fulan 4 no suspende ba tinan 3.

"JSMP rekoñese katak julgamentu movel nu'udar meu ida ne'ebé produtivu teb-tebes ba comunidade sira iha área rural, maibe JSMP enkoraza tribunál atu asegura prosesu hotu-hotu nafatin lao tuir mekanizmu legál ne'ebé eziste", dehan Direítor Ezekutivu JSMP Luis de Oliveira Sampaio.

JSMP observa katak julgamentu movel nu'udar pasu progresivu no apropriadu tebes iha kontestu Timor Leste ohin loron nian. Mesmu nune'e, JSMP preokupa ho prosesu julgamentu movel ne'ebé la trata ho kuidadu no sensivel, bele prejudika interese lejitimu husi parte sira ne'ebé involve iha prosesu ne'e.

JSMP deskobre tribunál falla atu proteze vítima violasaun seksuál ne'ebé involve iha kazu ne'e tanba julgamentu ne'e nakloke ba públiku. JSMP fiar katak autóridade judisiáriu sira legalmente konsiente katak kazu sira ho natureza violasaun seksuál no kazu ne'ebé involve menor no otomatikamente taka julgamentu ba públika atu proteze no garantia vítima nia identidade no privasidade.

JSMP fiar katak situasaun ne'e akontese tanba la iha liña kordenasaun ne'ebé efetivu entre tribunál ho polísia. Tanba ne'e, JSMP husu ba tribunál no instituisaun relevante atu kria kondisaun infrastrutura iha distritu sira hodi fasilita julgamentu movel ho diak.

Julgamentu movel ne'e prezide husi juis kolektivu ne'ebé kompostu husi Dr. Pedro Raposo de Fiquieredo, Dr. Costansio Baros Basmery, no Dr Hugo da Cruz Pui. Ministériu Públiku representa husi Dra. Benvinda da Costa Rosario no Dr. Jacinto Babo Soares. Arguidu sira hetan defeza husi Dr. João Henrique de Carvalh husi Defensória Públiku.

Atu hetan informasaun klaru, favor kontaktu:

Luis de Oliveira Sampaio

Direitór Ezekutivu JSMP

E-mail: luis@jsmp.minihub.org

Landline: 3323883